

玄覽堂叢書

第二十冊

玄覽堂叢書

卷之十

恭

進宣大山西三鎮

臣惟我

國家奠鼎燕京肘掖晉朔所恃為內蔽

者獨宣大山西三鎮耳宣大古雲中

上谷地山以西古并州境也北隣大

漠西瞰套虜自古稱戎馬之場我

成祖三犁虜庭宿重兵於三鎮以聲勢喝

虜大漠之南王庭掃而不幕休烈振



古無前猗歟盛矣厥後邊釁稍開間  
有冲突然小創之輒小挫大創之輒  
大挫罔敢越朔雲而進逼

陵京者畏三鎮之特其後也至嘉靖庚戌  
虜擁衆入犯

輦轂震驚不旬日而武臣仇鸞以大同  
兵入援又五旬而山西宣府勤

王師至虜繇是解散去以往事徵之利  
害休戚三鎮視九邊加重較然矣我

皇上威德及遠醜虜革心款市以來名王  
解辮髮叩關稽顙自比屬國而後先  
柄事之臣所為綢繆桑土之計亦既  
豫且周矣

皇上不以臣時寧未閑軍旅俾臣封疆之  
寄假臣節制之權即殫心罄力何能  
仰裨萬分一獨念虜性叵測款市靡  
常頃虜王率衆赴市陰肆要挾封豕  
雖未敢逞履霜已有其漸夫智者備

禍於未形今禍有其形矣脫異時渝盟而緩急機宜全資

廟筭則形勢之要害兵糧之實虛戰守之利便胡可不豫

聞也臣是用滋懼檄三鎮文武將吏各繪圖條說臣謹集其成而裁覈之繪繕進

覽臣敢僭一言序諸首簡臣聞易戒苞桑詩歌保定威嚴者順治之符也外寧

者內憂之伏也是以古先哲王安不  
忘危外不忘內今將整禦彎弓厲兵  
秣馬養餘銳以伺釁萌而逞志於一  
擊乎則有諸將吏在將固爾險隘戒  
爾車徒肅爾紀律嚴爾烽燧先為不  
可勝以待敵乎則有司馬法在將仍  
踵誕章謹節縮耀威武捐歲幣以市  
虜俾虜空羣而入我牧圉乎則有  
令甲在此臣等事也臣等責也臣又聞

之君職要臣職詳大小殊而任事一也后克艱厥后臣克艱厥臣尊卑殊而敬事一也我

皇上加意邊防動厯

宵旰武功遷次自偏裨而上朝

奏而夕可頃歲支不給不難破例移罔

金百五十萬以佐邊餉

聖念至殷矣則是圖也儻

萬幾之暇試一觀省則指形勝而悉要害

之處挾兵糧而知虛實之分審利便而達戰守之機

睿謨玄覽屈暨遐荒其籌邊至計當自出尋常萬萬臣等亦幸得與諸將吏遵奉戒事而奠封疆共天壤無極矣昔伯益告禹曰無怠無荒四夷來王召公告成王曰明王慎德四夷咸賓固忠藎之極致而明聖之芳軌也臣行能謏薄不足關

三金園言自序  
廟堂大議敢併以二臣之言

進惟我


皇上採納焉臣時寧無任隕越之至

欽差總督宣大山西等處地方軍務兼理  
糧餉太子少保兵部尚書兼都察院  
右副都御史臣楊時寧稽首頓首謹

序

# 三鎮總圖





宣大山西三鎮總圖說

我

國家定鼎幽燕迫近胡虜設險據勝以固封疆凡  
爲邊有九其最重而稱要害者莫如宣與大宣  
大故古雲中上谷地上谷拱護

京陵勢若輔車稍折而西北則雲中又折而西南  
則山西之鴈平寧武偏頭等關馬外環向三邊  
俱諸虜駐牧之地遠者六七十里近者不滿十  
餘里山西自爲一行省宣大特以地重文職各  
設大中丞一總一直指暨兵備府州縣等官武  
職各設大將軍一暨副叅遊守等官各有差三

鎮分土而治不相統轄緩急調遣應援事多掣肘至成化間復設總督大臣以統制之聲勢聯絡綱舉目張法制始犁然大備蓋上谷者

京陵之肩臂也雲中者三關之藩籬也三關者全晉之屏翰也故上谷安則

京陵無震驚之虞雲中安則三關無剝膚之患三關安則全晉享衽席之樂自昔籌邊事者孰不據忠殫慮期三鎮宴然上抒

九重宵旰之憂哉然動有得失虜警頻仍如操漏舟如室潰隄而鯁鯁然支吾不前者何哉蓋虜情有順逆時勢有難易經權之運用不同也三鎮

俱逼鄰北虜九塞中惟北虜最稱勁悍屈伸離  
合代變靡常至勝國僭竊釀禍已極洪惟我  
太祖肇啓丕基一統寰宇我

成祖繼承弘緒三犁虜庭帝王開創之烈振古無前  
其於北虜固禽獮而獸畜之後虜勢漸張正統  
己巳之變嘉靖庚戌之警幾危

宗社迨隆慶處劉汾石之間地方荼毒最慘幸天心  
厭禍孽孫來降俺酋以舐犢之故稽顙稱臣遣  
使獻琛三十餘年貢市如故恭順彌堅

朝廷之體統常尊邊塞之軍民樂業即唐虞之世  
詩書所稱來格咸賓之盛不加於此矣數年來

諸臣乘暇修守屯地開闢牛馬滋蓄頗繁雉堞  
嶙峋金湯遠邇相望譚者孰不艷而羨之然臣  
則大有隱憂焉蓋虜情叵測雖恭順終無不變  
之盟兵家常道即治世豈有忘戰之理聞酋婦  
三娘子初與俺荅感

朝廷浩蕩之恩故輸誠納款後三經易封終始不  
肯寒盟者本婦調護之力居多也今本婦年近  
桑榆若溘先朝露恐虜情未必帖然無譁且虜  
王近聽左右撥弄糾衆赴市要挾雖犬羊貪我  
利餌遽未敢決裂款事而叛亂之機已兆矣未  
雨徹桑正惟其時尚可仍蹈故轍因循怠玩泄

泄然如燕雀之處堂者。我隙端既開。虜慾何厭。  
倘卒然有變。將何以應。辟之養癰。然久之元氣  
耗散。一旦潰裂。其禍可勝言哉。爲今之計。惟慎  
選實心任事之臣。老成謀

國長顧遠慮以款爲決。不可恃而又當知有不可  
遽罷之款。以戰爲決。不可忘而又當知有不可  
輕試之戰。練兵積餉。除器繕垣。凡可爲戰守之  
具者。無不曲爲之備。事求其實。虜來尋盟。許市  
通貢。仍示羈縻之意。虜或背約。閉關謝絕。大興  
問罪之師。則可以款亦可以戰。可以撫亦可以  
剿。嚮背在虜而我常提其衡操縱在我。而虜難